



KENYATAAN/SIARAN AKHBAR

Perbadanan Putrajaya (PPj) ingin merujuk kepada artikel negatif berjudul 'Pemandu Asmara Tepi Bas' yang disiarkan melalui segmen Sentral, Berita Harian pada 14 Oktober 2010.

Pihak PPj ingin mengucapkan terima kasih di atas sikap keprihatinan penduduk melaporkan perkara ini. Walaubagaimanapun, berpandukan kepada maklumat serta siasatan dalaman, adalah didapati bahawa pemandu dan wanita bersama beliau adalah pasangan suami isteri.

Pada petang tersebut beliau bertugas di Laluan 501 dan waktu rehatnya ialah dari jam 6.30 hingga 7.15 petang. Pada hari itu pemandu berkenaan dan isterinya berpuasa. Jadi, gambar yang disiarkan itu dalam keadaan beliau dan isterinya sedang menunggu masuknya waktu untuk berbuka puasa.

Isterinya membawa makanan dari rumah di Presint 11 dan hasrat awal mereka berdua adalah untuk berbuka puasa di Putrajaya Sentral. Disebabkan tempat parkir bas di Putrajaya Sentral penuh waktu itu, maka pemandu tersebut membawa basnya ke bulatan berdekatan Hospital Putrajaya, tempat alternatif yang lazim bagi bas Nadi Putra menunggu giliran masing-masing untuk masuk ke Putrajaya Sentral.

Tindakan pemandu tersebut berdua-duaan dengan isterinya di tempat yang terpencil sememangnya kurang sesuai kerana ianya boleh menimbulkan syak wasangka daripada orang awam dan semua pemandu telah diperingatkan agar lebih berhati-hati dalam tindak-tanduk mereka.

Namun demikian, pihak PPj berasa kesal dengan laporan yang mengatakan pasangan tersebut berpeluk-pelukan, yang dinafikan sekeras-kerasnya oleh pemandu tersebut. Sekiranya benar berlaku adegan seumpama itu, mengapa tidak dipaparkan sahaja gambar yang menunjukkan perlakuan itu.

Pihak PPj tidak nampak sebarang kebaikan daripada tindakan mengada-adakan cerita yang tidak benar seperti ini. Sebaliknya kesan buruk yang timbul adalah sangat mendalam kerana orang awam akan mempercayai apa yang dilaporkan dan akan mula mempunyai tanggapan negatif terhadap semua pemandu bas Nadi Putra. Para pemandu Nadi Putra juga berasa sungguh terhina dengan laporan

yang berkenaan dan mereka telah bercadang untuk mengambil tindakan undang-undang ke atas laporan yang berunsur fitnah ini.

Oleh itu, pihak tuan adalah dimohon untuk menarik balik dan memohon maaf atas penyiaran laporan yang tidak benar ini kerana ia telah mengaibkan pemandu berkenaan, menghina pemandu bas Nadi Putra dan semua warga kerja Nadi Putra serta menjejaskan imej PPj.

Perhatian dan kerjasama pihak tuan berhubung perkara ini amat dihargai dan didahului dengan ucapan ribuan terima kasih.

Sekian dimaklumkan, terima kasih.

“ BANDAR RAYA BESTARI, KEHIDUPAN BERKUALITI “

“ BERKHIDMAT UNTUK NEGARA”

Saya yang menurut perintah,



(ZAHARAH SALAMAT)

Timbalan Pengarah Kanan Perhubungan Awam

b.p. Presiden Perbadanan Putrajaya

Tarikh: 15 Okt 2010